



17457

1

Mag. St. Dr.

P

e Hrygaczewski Michael


Garycki Bonifacii Praestantia  
Theologiae et Doctoris Theologi.

PANEG. et VITAE

Polon. 4<sup>c</sup>

№ 602







# PRÆSTANTIA.

## Theologiæ, & Doctoris Theologi.

Circa solennem ad Doctoratum in Sacra Faculta-  
te Inaugurationem

*Perillustum Clarissimorum & Admodum Re-  
verendorum Dominorum*

D. M. JACOBI NIEGOWIECKI,

Sacrae Theologiæ Licentiati, & PROFESSORIS, Geometrae Jurati,  
Ordinarii Mathematici, Collegæ Majoris, Ecclesiarum; Collegiatae  
S. ANNÆ DECANI, Parochialis in Zielonki CURATI.



D. M. MICHAELIS MRUGACZEWSKI

Sacrae Theologiæ Licentiati, Cursus Polemici PROFESSORIS, Geo-  
metrae Jurati, Collegæ Majoris, Ecclesiarum; Collegiatae S. FLORIA-  
NI CANONICI, Siradiensis Cancellarii, Parochialis in Gołcza CURATI,

Laureas conferente Doctorales

PERILLUSTRI & REVERENDIS-  
SIMO DOMINO

D. M. ANTONIO  
ZOLEDZIOWSKI,

Sacrae Theologiæ & Utriusque Juris DOCTORE & PRO-  
FESSORE, Facultatum; Theologiæ, Medicæ & Philoso-  
phicæ PRO CANCELLARIO, Ecclesiarum; Cathedralis  
Cracoviensis CANONICO, Collegiatae Visliciensis SCHO-  
LASTICO, Parochialis S. JACOBI Casimiræ PRÆPO-  
SITO, Seminarii Academico-Dioecesani PRÆFECTO.





Sub tertio semper felicissimo Regimine  
**PERILLUSTRIS & REVERENDIS-**  
**SIMI DOMINI**

**D. M. ANDRÆ**  
**L I P I E W I C Z**

Utriusque Juris DOCTORIS & PROFESSORIS, Ecclesi-  
arum; Cathedralis Cracoviensis CANONICI, Collegiatæ  
SS. OO. Cracoviæ CUSTODIS, Parochialium, in Koniu-  
sza & Igołomia CURATI, Scholarum Nowodworsciana-  
rum, necnon Contuberniorum Jurisperitorum & Regio-  
Jagelloniani PROVISORIS, Facultatis Juridicæ PRO-  
CANCELLARII, Studii Generalis Universitatis Cracovi-  
ensis Magnifici & Amplissimi

**R E C T O R I S,**

Distinctissimis coram Hospitibus

à

**M. BONIFACIO GARYCKI**

Philosophiæ Doctore & Professore, Collega Minore,

Oratione

**DECLARATA.**

ac

**IIIDEM PERILLUSTRIBUS DOMINIS**

recenter DOCTORIBUS renuntiatis

**PATRIBUS SUIIS & MECÆNATIBUS**


in votivam supremi istius litterarii honoris aggratulationem  
perenneque reverentis animi testimonium

**NUNCUPATA.**

Anno post natum Christum 1777. Die 4. Mensis Februarii.



PERILLUSTRES, CLARISSIMI,  
& Admodum  
REVERENDI DOMINI  
NEODOCTORES, PATRES  
&  
MECÆNATES!



*S*atis certum sentio, Viri virtute ac eruditio-  
ne Præstantissimi! Vestra erga me benevolen-  
tissima voluntatis argumentum, quum me lau-  
datione Hujus Cœlestis Supernæq; Sapientia  
Theologia cohonestare decrevissis. Perfacile  
inde intellexi, præsentem Orationem meam, non  
quopiam alio, sed vestro meritissimo Nomine ornari debere. Et  
sanè, cuinam inscribendam illam putarem? nisi his Viris, Qui  
necessariam conjunctionem, omnemq; Societatem cum Divina  
hac Facultate habentes dubium reliquistis, Vobisne à Theolo-  
gia, quàm Theologia à Vobis plus splendoris atq; ornamenti ac-  
cessisse? Tales enim Vos tantosq; Viros Sacra Scientia Docto-  
rali sibi devincit laurea, qui & à natura ad quæq; optima com-  
parati, & longa exercitatione diuturnoq; usu ad difficilia quæq;  
formati



formati, integritate Ecclesiastica vita conspici, moribus probis, meritis graves, summum Ei decus conciliatis. Imò, nisi id, quod re vera est, dissimulare velitis, hunc splendidissimum Theologia prerogativa gradum, vestris unice meritis acceptum referere debetis. Si verò is, Principi Oratorum Tullio, & honestus, & honoratus videtur, qui honorem sententiis, qui suffragiis adeptus est, profectò Vos estis amplissimi, qui virtute ac eruditione Vestra ad supremum Theologici Honoris fastigium evehimini. Qua de re ut plurima & illustra dederitis testimonia, illud tamen præcipua laude dignissimum puto, quod Ipsi in procinctu doctrina vestra penitissimè intellexistis, Religionem Christianam, id est, Supremam Dei Sapientiam absconditam à sæculo, in Christo tandem patefactam, salubrem illam Philosophiam non adspernari neq; evertere, sed velut pedissequam individuum adsciscere, & præclarò consortiò sibi copulare. In quo non modò Immortalia Ecclesiæ Dei Decora, humanarum Divinarumq; rerum scientissimos ipsos & consultissimos inter Christianos Auctores planè imitamini atq; exprimitis, verùm acutiùs etiam rationis ac Fidei remotissimos fines longè prospectatis. Vetusissima quoq; voluistis Academia dignitati consulere; & quemadmodum artes omnes, ut Cicero ait; vinculo quodam inter se continentur; ita peramplio ingenii Vestri ambitu singula earum studia conjunxistis. Quæ quum sint, quantis nominibus, & Præclaris Theologis, & Magnis Philosophis, & Parentibus Literarum, quas semper comites, & in omni Académica dignitatis gradu administras habuistis; Laudationem istam Theologia qualemcunq; debeo? Illud duntaxat unum Vos oro obtestorq; ut Orationem meam, quæ gratiâ solennis Vestra Inaugurationis instituta est; perquam hodiernæ celebritati accommodam, ea, qua præditi estis humanitate complectamini. Id ego si obtinuerò, satis amplam ingenii mei fructum percepisse videbor, spemq; concipiam id fore præcipuum meæ erga Vos observantiæ pignus, & amplioris Vestri erga me patrociniî monumentum.



# Ode

**J**urata doctis Pallas honoribus  
Assurge, quæso, nec propriæ memor  
Divinitatis, fac ministram  
Et sacra sterne mitræ theatra.

Multa redemptæ merce scientiæ,  
Multoque partæ sanguine Laureæ  
Diisque mentes foederatæ  
Theologiæ famulas Deorum

Dextras reposcunt: fas, Deus ut Diis  
Insudet alter; quos Toga doctior,  
Et vita librorum perennis  
Ignibus æthereis adoptat,

Horum Deæ & Diû pignora pectoris  
Fas est, ut ornent laudis adoræâ  
Cœlo stupendâ consecrando  
Canitiem viridesque curas.

O me



O me secundus si ferat entheus!  
Citando gressus, ibo, ubi CANTII  
Multas per ætates honori  
Thuricremi famulantur ignes.

Heu! quæ Virorum conspicio agmina!  
Qualesvé cœtus! en meritis graves  
Annisqué, succinctæqué curis  
Sensa vomunt Animæ retrusa.

En se vicissim Gloria mutuïs  
Horratur ausis, discolor ingeni  
Relucet in vultu venustas  
Et vario magis igne pulchra.

O! quàm potenti nixa scientia  
Edocta Virtus lucra sibi facit,  
In ore, quam nutrit sacрати  
Par venerabilius Lycæi.

Quis NIEGOVIECCII pectoris impetus  
Suiqué largam nesciat indolem  
Plenoqué constanter redundantem -  
Ore Deum niveosqué cultus?

Namque



Namque & Deorum fixa adamantinis  
Decreta valvis non humili potens  
Audet remoliri calore  
Et valido replicare nisu.

Inevoluto seu calor incitat  
Instare vero, nec dubio Deum  
Urgere gressu, mox recludit  
Divitis ingenii recessu.

Hic litterati plurimus otii  
Sic concitatis passibûs arduam  
Viam remetitur, Deorum  
Noverit ut penetrare calles.

MRUGACZEVII an pressero Spiritûs  
Flammas? & ampla divitias penu  
Fusas? redundantesque fruges  
Ingenii, cumulosque mentis?

O! Lux docentûm clara Cohortium  
Hæresque Ludi, Theologi nitens  
Decor Senatûs! ô Ocelle  
Nobilium venerande Patrum!

Te



Te candor altæ proditor indolis;  
Virtus profusi nuntia pectoris,  
Mens, Corporatô septa Verbô  
Coetibus accumulât beatiss.

Tu Incomprehensi difficilem aspici  
Gaudes Tonantis currere semitam,  
Et illa mortali Deorum  
Culmina vix adeunda visu.

Tibi Sophorum vidi ego grandibûs  
Arsisse pugnâs atria, porticus  
Undâsse, jurgantisque pulchrâ  
Ingenii fremuisse rixâ.

O digna sacrô Nomina seculô !  
O juncta virtus ! ô pia Pectora !  
Jo ! triumphate ! hæc Corona  
Grandibûs evigilata curis.

ORA-



# O R A T I O.



Cum diu, multumq; mecum ipse reputarem, AA. quid potissimum dicendo asserere possem; quod animos vestros ad benevolam attentionem excitare, & Theologici honoris, quem Viri celeberrimi, post tot tantosq; labores, in hac pervetusta Universitate exantlatos hodie tandem consequuntur, celebritatem adaugere valeret, multa mihi, & illustria quidem singula, obversabantur argumenta. Quæ verò dudum à disertissimis Viris & diligentius occupata, & magno sublimis eloquentiæ apparatu tractata luculentius, spem omnem eorundem argumentorum, locos strictim cursimq; brevi hoc tempore, quod ad dicendum tribuitur, pro dignitate retractandi, nedum mihi omnium Oratorum infantissimo, verum etiam cuiq; facundissimo, prorsus eripere animadvertebam. Quamobrem planè intelligebam AA. quam difficilis mihi deliberatio esset, in tanta Orationis copia, unum illud seligere, quod aliquo pacto extollere possem, quamq; arduum & periculosa plenum alex negotium subire cogerer, qui de laudibus Theologiæ, atq; Theologorum Virorum sermonem instituere contenderem; præsertim, cum in hac certatim palæstra Viri omnium eruditissimi disertissimiq; summa cum laude hætenus insudârint. Timendum itaq; & non mediocriter mihi timendum erat, qui cum illis neq; ingenio, neq; doctrinâ comparandus sum,



ne majore animo quàm consilio dicendi rationem suscipere existimarer. Hujus enim rei magnitudo tanta est & gravitas, ut facilè cujusvis hominis animum, & se rebus omnibus futurum esse parem existimantis debilitare possit ac frangere, nedum meum, cujus susceptæ vitæ rationes id quodammodo videntur suo jure postulare, ut nullum tam leve à me ducatur onus, cui non vires meas impares omnino profitear. Quare tacuisssem libenter, ut pudor mihi à natura tributus admonebat, neq; in hunc locum, qui eloquentissimis Viris semper patuit, unquam descendissem, nisi me ad dicendum Superiorũ authoritas, quam detrectare non licuit, cõégisset. Atq; in tam ancipiti mentis evagatione, in tam difficili cogitationum tumultu, illud in animo meo frequentissimè versabatur, & maximam admirationem pariebat, quòd cum omnibus luculenter perspectum esset, Theologiam inter reliquas facultates esse præstantissimam, quæ quoad ejus fieri potest cum humanis Divina copulando, mortalitatem nostram, quantum ejus imbecillitas patitur, Divinæ naturæ arctissima colligatione devincit, quòd inquam supremam, hanc sapientiam, hominum generi divinitus donatam à plerisq; contemni, & publicos honorum gradus qui Viris de Theologia optimè meritis deferri consueverunt, ceu leve quiddam ac nugatorium reputari audiamus. Horum ego malevolorum hominum iniquæ ac injuriosæ opinionioni respondere in animum induxi, illudq; unum principe Orationis loco statuere. *Præstantiam Theologiae & Doctoris Theologi* esse omnibûs numeris absolutam. Id verò, antequam ulterius provehar, à vobis summopere contendendo AA. ut, quando omne mihi perfugium in vestra benevolentia ac humanitate situm est, tenuitatem meam vestro favore sublevetis, quò mea Oratio, scopum, quem sibi proposuit, faciliùs consequatur.

Atq; ut hinc exordiamur, Si nihil diceremus aliud,

nisi



nisi eam, quæ antiquissimò vocabulò Theologia dicitur, scientiam esse quandam, quæ ipsum Deum haberet Authorem & Parentem, quæ Divinæ Sapientiæ thesauros recluderet, quæ ad salutem humanam omnino referretur, tamen illud, ut opinor, liquidò constaret, quantò æterna nativis, immortalia caducis, divina humanis antecellunt, tantò esse hanc facultatem cæteris omnibus anteponendam. Quid enim majus, quid præstantius, quid augustius, quid divinius, excogitari potest illâ doctrinâ, cujus materia subjecta Deus est, finis Deus, Auctor ipse Deus, forma ipsa digna Deo. Ponite vobis AA. ante oculos omnes artes ab hominibus inventas, quæ propter earum rerû, quas docent magnitudinem, aut propter extremi ejus, quo referuntur, præstantiam, aut propter inventorum gloriam, aut propter exquisitum aliquod & singulare dicendi genus commendantur, ex hac contentione magis Divinæ doctrinæ splendor elucebit. Illæ humi penitus jacent, & si quando se altius erigere conantur, non longè tamen ab humo recedunt; hæc relictis terris æerem superat, & procul ab hominum oculis abstracta, Cælum ipsum & illas, quæ solo animo cernuntur, incorporeas mentes celeri atque arduo volatu transcendit. Illæ rerum humanarum perangustis cancellis circumscriptæ, si quando Divinas attingunt, transferunt ad humanas, hæc in latissimo rerum Divinarum campo libere pervagata, si quando tractat aliquid de humanis, traducit ad Divinas. Illæ solum de Deo mentibusquæ singularibus tradunt, quæ humana ratio consequi potest, at hæc nostra Divino Numine nobis afflata, Philosophis antiquis penitus ignota, cum nihil doceat, quod non aut Deus ipse sit, aut referatur ad Deum, permulta declarat, quæ suapte natura illustrissima, nobis ob imbecillitatem animi obscurissima, cum à nemine viribus ingenii cognosci possent, omnibus credere volentibus Divina benignitate patuerunt. Nostra enim  
mira.



mirabilis illa mundi molitio, & primorum hominum, tanquam alterius mundi minoris, tam solers, tam stabilis, tam accurata fabricatio, nostra eluvio terrarum & animalium semina Nôe diligentia & labore servata, nostra Divina humanæ mentis origo, nostra Christi veri Dei hominis vita & mors, nostra salutaris peccatorum expiatio, judicium de omnibus hominibus formidolosum, spes verè beatæ & æternæ vitæ; quibus de rebus aliisque permultis, quæ sunt propriæ scientiæ Divinæ, siquid aliquando nonnulli Græcorum sapientes tetigerunt, aut tam inepti fuerunt, ut ridendi sint, aut tam impii, ut detestandi. Et quisquam est, qui alias omnes, si in unum conferantur, scientias cum hac, qua ista tam pulchra, tam admirabilia, tam Divina traduntur, ullo modo comparandas putet? Hæc verò una est omni cura, & studio dignissima. Hæc una est non tam liberalis vocanda, quam liberatrix. Hæc scala, quam olim per quietem sanctissimus Patriarcha vidit, cujus gradibus in Cœlum scandere liceat. atque illic Deum intueri, admirari, adorare demittentem semetipsum ex augustissimo illo Majestatis suæ fastigio, se sequè accommodantem ad humanæ conditionis humilitatem, rursusquè eundem defunctum nobili illa servandorum mortalium provincia, spoliatisquè inferis (o rem omni humana cognitione sublimiorem,) in Cœlum raptum vallatumquè ac stipatum, infinita tum, geniorum concinentium, tum hominum de caliginosissimis satanæ ergastulis erutorum multitudine justò ac plenò triumphò Cœlum ingredientem, neque disiecta muri parte; sed valvis suo sanguine reclusis, iter eodem nobis omnibus aperientem.

Atque hæc quidem quamvis ejusmodi sunt, ut ad excitandum inflammandumquè quemlibet torpentem animum sufficere posse videantur, tamen ex tam ubere campo alia quædam, nisi molestum est, proferamus. Verè enim



enim illud affirmare posse videor, hanc scientiam & sententiarum varietate & cum eorum, qui instituuntur, ingeniis convenientia omnibus disciplinis antecellere. Etenim illæ sic traduntur, ut iisdem verbis plus uno significare non possint, at hæc Divino munere nobis concessa doctrina, uno eodemque genere sermonis, & rem gestam exponit, & Mysteria Cœlestia subtili magis & arcana significatione demonstrat; in illis verba sola tum propria tum translata significant, in hæc verò disciplina planè cœlesti, non modò verba, verum etiam res ipsæ, quæ significantur, aliquid designant. Illud est Divinæ sapientiæ cum omnibus facultatibus & artibus & scientiis commune, hoc quantumcunque demum est, totum est proprium ipsius. Nihil sibi ex ista laude Grammaticorum exquisitæ reconditæque literæ, nihil argutiæ Dialecticorum, nihil Oratorum ille apparatus, & quasi pompa decerpit, quin etiam illa ipsa Philosophia, quæ rerum tum humanarum, tum Divinarum cognitionem, & causarum, quibus eæ continentur, traditarum, se esse profitetur; nomine quidem verecunda & modesta, re autem arrogans & impudens & proterva, nullam sibi partem istius possessionis ne defringendò quidem surculò usurpat; Divinæ sapientiæ de jure cedit, & quidquid dignitatis & ornamenti in hac tam multiplici optimarum artium varietate positum est, id totum hujus unius doctrinæ proprium esse confitetur. Possunt quidem homines, qui sinè dubio cæterarum disciplinarum conditores & amplificatores extiterunt, veteres verborum significationes abrogare, instituire, & promulgare novas, arbitriòque suo verba fabricare, quibus id significetur, quod ipsi velint: possunt jam res ante factas ad alias declarandas accommodare, licèt non ideo factæ fuerint, ut eas significarent; ut si quis ea, quæ in aliquo prælio contigerunt, transferat ad eadem demonstranda, quæ nobis in hoc bello vitiorum atque

virtu-



virtutum efficienda sunt ad vincendum: Possunt aliquid facere, quod ipsum dum fiat, aliud declararet, ut ille fecit qui filio summis papaverum capitibus baculo decussis Gabinæ Civitatis Principes aliqua arte opprimendos indicavit. Fingere denique multa possunt tum narrando, tum demonstrando, ut in Pœtarum fabulis fieri videmus, omnia verò, quæ gesta sint aliquando ad alia declaranda narrare ac docere, ut non solum, dum narrantur, mysticas habeant significationes, sed etiam tum, cum gererentur, aliud aliquid notarent; hoc nullius hominis est, hoc solius Dei est, quo Auctore nostra sapientia jure gloriatur. Quare in scriptis hominum, cujus illa modi sunt, ubi sententiam eam, quæ vi verborum continetur, cogitatione comprehenderis, nihil habes amplius, quod requiras. Quanquam in historia virtutum exempla proponuntur, quæ sequamur, vitiorum, quæ vitemus, & ex rebus in bello gestis aliqua similitudo peti potest, ad hanc vitæ Christianæ militiam salutaribus Præceptis instruendam, atque hæc multò maxima utilitas historiæ jure censetur, tamen, quæ commemorantur, sic interpretari, ut Pompejo Christum, Cæsare malum genium significari dicas, & hujusmodi portenta longa & assidua commemoratione non excogitare solum, sed etiam mandare, litteris, edere, pervulgare, ut nescio quis aliquando fecit; hominis est, siquidem sentit quantam maculam suscipiat, estimationem suam contemnentis, si autem non intelligit, quantum flagitium admittat, vel stupidi, vel amentis. Fabulas autem vel pueriliter, vel ineptè sine causa vel ad id tantum, quod accidisset, aut in natura positum esset, cum voluptate declarandum fidas ab antiquis, ad nostram Religionem traducere conari, Janumque bifrontem, aut Cerberum tricipitem, aut tres Parcas, aut totidem Gorgonas, aut tridentem Neptuni, aut trifidum Jovis fulmen, aut clavam Herculis trinodem cum Deo

Trino



trino & uno comparare, ceteraque inania monstra pri-  
scorum, ut non modò ex profanis, verum etiam ex impiis  
nonnemo tentavit: quid quæso aliud est AA, nisi gem-  
mas clarissimas lutulentis conculcare pedibûs, & splendo-  
rem Divinarum rerum impurissimorum hominum sordi-  
bûs obscurare? At in litteris Divinis cognita vi & signi-  
ficatione verborum, siue suam quodque sedem obtineat,  
siue non impudenter migrarit in alienam, quæ pro De-  
um immortalem? ex rerum significatione subtilitas, quæ  
Divinitas ad cogitandum, quanta copia, quam grata &  
jucunda varietas ad dicendum ostenditur? Illæ veteris Le-  
gis cærimonix umbram quandam habebant veritatis, &  
quasi notæ quædam erant atque signa eorum, quæ expe-  
ctabantur. Quàm multæ hinc, quàm novæ sententiæ, quàm  
admirabiles existunt, quantus utriusque Testamenti & ve-  
teris & novi quasi concentus reperitur? Res à Christo  
gestæ præsertim in sanandis corporum morbis, quid no-  
bis faciendum sit in animis curandis ostendunt: quanta  
sententiarum ex hoc uno fonte vis, quàm copiosum, o-  
rationis flumen erumpit ad conformandos hominum mo-  
res, ad vitam instituendam, ad monendum, ad cohortan-  
dum? Quæ illustribus quondam Viris unius Dei cultori-  
bus tum veteri Lege, tum ante Legem latam naturæ præ-  
scripto benè beateque viventibus acciderunt? Liberatoris  
nostri facta ac Discipulorum solennes Ecclesiæ ritus cæ-  
rimonixque sacræ quandam imaginem illius hierarchiæ cœ-  
lestis habent, & Divinæ vitæ, quàm speramus, quàm im-  
mensus campus aperitur, quàm infinita silva proponitur,  
& ad commentandum & ad loquendum, quàm abstrusæ  
sententiæ, quàm graves ad erigendam spem suppeditan-  
tur? Testes sunt Viri librorum & sapientiæ & vitæ laude  
præstantium, qui profectò neque ubertatem, neque gravi-  
tatem neque varietatem tantam haberent, nisi illi, à qui-  
bus conscripti sunt omnes litteras Divinas explanandi vias



incredibill' stud'is fuissent, curâ, diligentia profecturi. Qui verba solummodo vidit, quam vim habeant, is Divinam Sapientiam veluti de facie tantum novit: mentem ipsam occultosquë sensus ille perspicit, qui assiduo usu potest, ab aliis quæ verbis conclusa sunt, ad quæ rerum significatione ducimur, animò pervenire. Quantò igitur ipsa ratio sermonis hæc præstat omnibus disciplinis ac scientiis humanis, cum illæ uno sint interpretandi genere contentæ, hæc quatuor tam inter se dissimiles res ac dispares rationes accipiat explanandi? Non dubito AA. quin hanc tantam varietatem, cum ad cogitandum uberem, tum ad ornandum amplam, atque magnificam esse iudicetis.

Quod si quis eam, quæ ex levioribus studiis percipitur amoenitatem quoque requirit, ne eam quidem in feracissimis Theologiæ campis frustra desideraverit. Nam ut cætera omittam, si ipsius historiæ suavissimæ cognitione ducimur, unde veriores, unde scitu digniores historias, quàm ex sacris litteris repetere poterimus? An verò saavius est cognoscere, quid Cræso in Medos, quid Pyrrho in Romanos expeditionem paranti obliquè Apollo, quàm quid Moyse ad Pharaonem, quid Samueli in Palæstinos proficiscenti, apertè ac perspicuè Deus ipse responderit? Quomodo Regulus à Cartaginensibus, quàm quomodo Servator humani generis Christus à Judæis omni crudelissimorum suppliciorum genere divexatus fuerit? Jucundiusne aut fructuosius arbitramur intelligere, quibûs artibus Assyrii, Persæ, Romani cæteras nationes devicerint, quàm quibûs augustissimi illi Religionis nostræ Principes, alique deinceps innumerabiles eorum vestigia secuti, Christianæ ditionis terminos ampliaverint? Magna hæc sunt & præstantia AA. quæ à me de Theologia afferuntur, sed longè majora longèquè præstantiora nostris etiam oculis usurpabimus, si ea in Doctore Theologo paulò diligentius consideremus.

Non



Non est profectò, non est quidpiam leve ac nugatorium Doctoris nomen, nec officium AA. Hujus equidem si origines paulò altius persequi studeamus, atque non ita arctis definiamus regionibus, una cum litteris natum, & usque ad hæc nostra tempora propagatum fuisse facile possumus assentiri. Nisi enim extarent omni tempore hujusmodi Viri, qui has litteras & ipsi per se excolerent, & cum aliis communicarent; sanè intelligi non potest, quonam pacto post hominum memoriam profectæ, nobis etiam incolumes redditæ spectarentur. Litterarum autem originem, progressum & incrementum retexere, tantò magis supervacaneum existimo, quantò certioribus historiarum erudimur argumentis, easdem primo Protoparenti nostro à summo Conditore donatas ad nos posteros promanasse. Illud tamen cum veritate dici potest, cum scilicet procedentibus Annis Academiarum, Doctorumque numerus per Orbem in immensum augetur, tunc de certa & meliori profitendi ratione, de numero Annorum, de severioribus Legibus, quæ ad varios adimendos abusus ubique observarentur, summos Pontifices, Imperatores, Reges ac Principes, Litterarum ac Litteratorum amatores immortalì memoriâ consignatos, eam iniisse cogitationem, ut nimirum autoritate publica à Scholasticis conventibus, solenni & accurata disquisitione prius facta, certum virtutis atque eruditionis testimonium, non vanæ levitatis, aut nugatorix opinionis titulum, habituri Doctores crearentur. Quod factum esse cum Bononiæ, olim Felsinæ ante tredecim sæcula sub Theodosio juniore ex Privilegio Academiæ Bononiensi concessio, tum Parisiorum Lutetiis æræ Christianæ adhuc Annò 791. sub Carolo Magno ex Epistola ejusdem Religiosis Lectoribus demandata legimus, atque etiam non interrupta Annorum serie ut in aliis, ita in hac Universitate Filia Parisinæ hodie dum fieri observamus, Neque debet erubescere



re idcirco veneranda antiquitas, si quid melius horum, quæ ipsa tradidit, novitas adinvenit. Omne enim artificium paulatim ad meliorem frugem per eruditionem accedere, & suum incrementum recipere nemini ignotum esse arbitramur. Quanquam autem hoc nomine honorificentissimo decorentur illi, qui vel Legibus vel alicui ex supremis autem superioribus, ut vocant, facultatibus operam navantes publicum de doctrina approbatæ Academiæ testimonium acceperunt, illud tamen non mea quidem sententia sed doctissimorum Virorum atque ipsa sic statuente Lege affirmare debeo, Doctores Theologos ob præstantiam, Majestatemquæ officii, quod sectantur longè cæteris anteire.

Omnes quidem in societate Christiana, qui non sibi solum prospicere, sed etiam aliis, quoad possent: adjumento esse voluerunt, duobus mihi generibus videntur contineri. Partim enim non docendo sed agendo, alios ad probitatem & morum sanctitatem incitare studuerunt. E quorum numero fuerunt castissimæ illæ virgines & viduæ, quæ inusitato vitæ genere, Beatorum statui peculiariter sæpe ipsis terribilissimis Christianæ Religionis hostibus maximæ admirationi extiterê. Ex hoc Antonii, Pauli, Onuphrii, Hilariones, Benedicti, Brunones, alique Divini homines prodierunt, qui abjudicatis à se facultatibus Patriis & avitis, voluptatibus corporis recisis, majorum dignitate contempta, spe rerum humanarum abiecta, solitudinem oppidis, abditissimos nemorum recessus, frequentissimis urbibus, feras agrestes hominibus, antra tectis, molli lecto asperum solum, somno peramœno assiduas vigilias, inedia saturitati, laborem quieti anteposuerunt. Alter est gradus paulò altior eorum, qui rerum cognitione divites, multorum intelligentiâ præstantes, nec etiam dicendi ornamenti inopes jam persuadendo, jam erudiendo, jam cohortando cæteros ab errorum tenebris

ad



ad lucem veritatis, à turpitudine ad honestatem, à sce-  
rum enormissimorum colluvie ad virtutis pulchritudinem,  
ab immanitate ad comitatem traducere contenderunt,  
Quo de genere processerunt Gregorii, Athanasii, Epi-  
phanii, Irenæi, Justini Martyres, Dyonisii Areopagit-  
æ, Cyrilli, Clementes, Cypriani, Chrylostomi, Hie-  
ronymi, Augustini, Ambrosii, Thomæ Aquinates,  
Bonaventuræ Seraphici, Joannes Cantii & complu-  
res alii sublimem doctrinam pari cum sanctimonia,  
veluti sororino nexu ligantes. At verò ex duobus à  
me recensitis hominum alios adjuvare pro virili par-  
te cupientium generibus, licet priores tantò sint po-  
sterioribus præponendi, quantò plus ad torporem aliorum  
excitandum valent exempla, quàm verba; neutrum tamen  
horum mihi videtur perfectum, si debitis præsidii desti-  
tuatur. Nam fac abesse vitæ dignitatem, quid quæso vi-  
rium & roboris ad imperitæ concionis animos regundos,  
sapientia ea habeat, quam docentis flagitiosa vita confu-  
tet & refellat? adsit probitas, quid amabò illa proficiet;  
cùm vel ad consilium dandum in rebus arduis doctrinæ,  
vel ad sedandas perversas populi cogitationes, ad proflig-  
andas innumeras pravorum dogmatum copias sapientiæ  
subsidia desiderabit. Is igitur erit Doctor Theologus o-  
mni laude cumulatus, mea quidem sententia hoc tam  
gravi dignus nomine, qui & quameunque rem sapienter  
providendo, & vitam castè sanctèquè degendo, multitudi-  
nis turbam Christi morte ex faucibus inferni ereptam, ejus-  
dem pretiosissimo sanguine in libertatem filiorum Dei re-  
demptam bona docere, mala dedocere sic poterit, ut nec  
invitè nec inutiliter audiatur. Quò autem exactius mu-  
neris sui partem Doctor Theologus absolvat ego quan-  
tum assequi cogitatione possum, multorum eadem de re  
judiciis auditis duplicem eidem, qui sit futurus vitæ Ma-  
gister, populi Christiani Rector, temperator animorum,  
Dux



Dux omnium, per tot tantaque pericula ad altissimum  
Sanctorum domicilium magno labore, nisu, & sudore  
contententium, duplicem inquam illi rerum cognitio-  
nem pernecessariam esse arbitror. Unam earum, quæ pro-  
priae sunt hujus adeò perplexæ functionis, alteram ea-  
rum, quæ ad illas percipiendas & dignè tractandas, non  
parvum auxilium præbeant, foris sunt assumendæ. Illa  
primi generis Theologia perquam apostitè vocatur, cujus  
summa est fides, spes, caritas. Fide ad Deum accedimus,  
spe adhuc in diebus carnis nostræ ipsum quodammodo  
tenemus, caritate cum eo copulamur. Fides tandem  
aliquando cedit, spes evanescet, caritas una multò per-  
fectior remanebit. Fidem exultantem lumen gloriæ, cla-  
rissima nempe felicissimaque visio excipiet, fugientem  
spem summi boni stabilis possessio consequetur, cari-  
tatem fortius corroboratam & aspectus & usus tantæ fe-  
licitatis vehementius inflammabit. Citra hujus ergo ac-  
curatam peritiam, non ille provinciæ sibi commissæ satis-  
faciet, ut potius tantò paratior sit ad nocendum, quantò  
à sacra religiosaque doctrina minùs instructus ad institu-  
endum. Imò veriùs is maturandæ necis, quàm salutis ani-  
marum reparandæ Auctor existet. Secunda cognitio om-  
nes humanas disciplinas, multijugem eamque non le-  
vem & perfunctoriam antiquitatis totius notitiam com-  
prehendit. Nam cum Doctori Theologo sua est Religio  
non explicanda modò, sed etiam ab oppugnationibus de-  
fendenda, & qui Christianæ Religioni errores adversantur,  
sunt ii omnes reprimendi, configendi, & proscribendi,  
Bone Deus quàm versatus in Philosophia sit oportet eius-  
modi Theologus. Quid enim si qui hominum, quod  
sæpe jam accidit, eò furoris prolabantur, ut Deum de me-  
dio tollere, sapientissimaque Illius Providentiæ nefarium  
bellum indicere, animorum perennitatem inficari conen-  
tur, nonnè argumentis ex intima Philosophia depromptis  
tanta



tanta hæc, tamquæ ferina impietas procul ultra Orbis tet-  
rarum margines amandanda, exhibilanda atque exploden-  
da? Quod si contra alii unius Imperium pertasi, multa  
in hunc vastissimum superorum, mediorum, infimorum,  
ambitum numina inducant, nonnè ficta hæc & commen-  
titia deorum multitudo ex ipsis humanitatis principiis  
veterumquæ Græcorum dictis destruenda stirpitus, & di-  
sturbanda? Quid si perditissimi Philosophi pulcherrimum  
Dei munus ad Religionem conculcandam, ad ejus lucem  
obscurandam, ad nomen Christianum extinguendum at-  
que delendum convertentes, quales & Celsus, & Porphi-  
rius, & Julianus desertor levissimus, & Spinosa Rituum  
nostrorum irrisor petulantissimus plus justò Philosophiæ  
tribuens, aliiquæ fuerunt, & ad hæc usque tempora, quod  
valdè ægrè ferendum, sunt: si inquam hi perditissimi Phi-  
losophi acerbius in Romanam fidem & contumeliosius  
invehantur, & quæ ejus sunt summa & sacrosancta im-  
primis capita omni argutiarum genere infirmare atque  
abolere, vel tanquam rationi humanæ repugnantia, ac  
planè falsa in dubium revocare satagant, nonnè horum  
ipsorum Philosophorum, aut si Diis placer perverissimo-  
rum Theologorum in Christum sacramquæ illius apud sui  
Vicarios relictam doctrinam maledicta ex iisdem eorum  
capitibus retundenda, & quæ contra sunt objecta ex illis  
ipsis, ex quibus ducta sunt locis dissolvenda? nostra verò  
æternæ veritatis placita, quàm cohærentia inter se sint, quam-  
quæ nihil discrepans, & à recta ratione alienum contineant,  
Philosophicò identidem argumentò demonstrandum? non-  
nè obviam castris inimicorum eundum, amentia frangen-  
da, præpostera de Religione sentiendi libido, ne impunè  
grassetur refrenanda, ovilisquæ Christi tranquillitas in tu-  
to collocanda, tabes & lues eradicanda? Paucis loquar:  
gladius extorquendus est hosti de manibus, suo proprio  
mucrone petendus, eiquæ illa ipsa acie caput amputan-  
dum,



dam, qua hic nostrum jugulum ferire intendebat sicquē  
ex morbo medicina facienda. Enimvero quid testimo-  
niorum nostrorum pondus tamen gravissimum atque  
Divinum apud eos unquam valeat, qui ne tantillum eo-  
rum monumentis concedunt. Si jam universus virtutum  
ornatus firmamentum Divinæ doctrinæ & robur ac-  
cedat, explicari vix potest, quanto fortior sapientia ap-  
parebit. Nam cum, qui mentem exquisitissimis discipli-  
nis compleverit, mores autem retineat scelestos, malèquē  
oleat, doctum ego fortassis permittam, quod nec priscæ  
superstitionis sectatoribus Philosophis vera probitate de-  
stitutis adimo, aut sapientem, ipsius virtutis optimæ paren-  
tis filium, sive virum sibi & aliis utilem, Doctorem Theo-  
logum, qualem rigida Christi exigit Schola citra omnem  
dubitationis aleam negabo. Quid enim litteræ in homi-  
ne nequam & improbo? nisi ensis districtus vesano & fu-  
rioso, quo interficiat perimatvè, datus, nisi sicæ omni  
humanitatis sensu exuto latroni concessa. Tristissima  
hac de re plusquam millena habent Ecclesiæ Annales  
exempla, quæ nulla unquam ætas satis lugebit, nulla de-  
lebit oblivio. Quos namque orcus non evomuit homi-  
nes, qui typho superbiæ tumidi, Philosophiâ armati, elo-  
quentiâ stipati, favore Principum formidabiles contra Ec-  
clesiam aperto Marte vexillum erexerunt, illiusquē Sa-  
cro sanctam Authoritatem conferta manu atque conglo-  
merato agmine oppugnârunt. Quin & ipsamet Ecclesiâ  
proh dolor! perduelles interdum peperit filios, qui vi-  
rulentas doctrinas molientes, diraq; schismata invehen-  
tes, viperino dente ejus viscera prosciderunt, illius incon-  
sutilem tunicam varias in partes diruperunt. Stetit  
quidem invicta Sponsa Christi tutissimò tanæ disciplinæ cly-  
peo munita adversus conjuratas potentias, tantam nihilo-  
secius ediderunt stragem, ut inflicto vulnere in membris  
à corpore mystico relictis non protinus mederi valeret;

Istius.



Istius notæ sapientibus, qui vitâ moribûsquē corrupti ad indignas homine voluptates cum animantibus rationis expertibus depressi, vagis absurdisque opinionibus à lumine veritatis abducti, qui inquam non sapientiam, ejus se falsò amatores prædicant, sed temeritatem, non doctrinam, sed errorem confectantes, utile ab honesto sejungentes, improba quæque somniarunt & nefanda, nihilquē præter inanissimum adulterinæ sapientiæ nomen, solidi, nihil sapientiæ digni posteritati reliquerunt, tantum abest, ut album calculum adjiciam, ut satius tanquam generis humani probra & veræ sapientiæ hostes toto Orbe ejici percipiam. Quare si aliquid sapio, sic omnino statuo: morum integritatem, vitæ innocentiam, omnemquē singularem animi probitatem, strictissimam, habere cum sapientia Doctorequē Theologo necessitudinem. Profectò ipsum Theologiæ nomen adeò per se sacrum, venerabile & divinum est, ut quidquid non dicam enorme & flagitiosum, sed vel tenuissimum humanæ imbecillitati affine vitium ab hujus integerrimæ facultatis cultoribus prorsus excludat. Cum sic comparatum esse advertimus, ut Theologia & Religio, Religio & virtus, uno eodemquē spiritu vivere videantur.

Tenemus jam AA. tenemus Viros Theologicâ laureâ dignos, nomine & re dici Doctores promerentes, quos cursu hujus Orationis tantò studiò quærebamus. Tanta enim est horum Virorum, quos præsentem suspicimus, commendatio, tanta virtus, tam singularis sapientia, ut ab illis hæc ipsa scientiarum Universitas, ipsa Patria atque Religio, plurima bona se habere, majoraquē polliceri non immeritò glorientur. Namque ad summam consummatamquē omnium rerum scientiam contendentes, cum planè perspicerent humanioribus disciplinis viam & rationem ad reliquas superiores comparari, primos putitæ annos tanto voluntatis ardore illis devoverunt, ut



non, quod ajunt, litteras primis degustarent labris, sed linguam Latinam, artem Oratoriam, Poeticam facultatem, totamque humanitatem penitus absorberent. Vidisti porro Alma Universitas, non fuisse delusam tui expectationem, vidisti in utroque hoc Viro pectoris tui robur & gaudium, proinde uti iusta ingeniorum coronatrix, eruditam utriusque virtutem, & præclaram eruditionem, utrâque in AA. LL. laureâ exornasti. Hac nova litterarum honoris accessione adaucti, deferbuitne putatis illorum ardor in scientiarum contemplatione? relanguitne sedulitas in veritatis indagatione? procul id ab eorum instituto absuit. Quin verborum Erasmi non immemores; nulla scilicet faciliori uspiam ratione posse in doctum, evadere quempiam, quam si doctis assiduè conviveret, si doctos attentè & reverenter audiret, si doctos invictè legeret, si doctos diligenter evolveret, huc omnes nervos intenderunt, ut ex convictu, auditu, alloquio doctorum, seria librorum lectione, & quotidiana eorum ruminatione, doctiores redirent, semperque suo, quem indefessè excolebant agro, aliquid bonæ frugis accederet. Inruamus ergo solertissimos Philosophos, qui insignibus honoris Philosophici cohonestati, naturæ penetralia subtilissimè scrutantur, altissimas rerum causas incredibili celeritate assequuntur, Physica arcana sapientissimè expli-  
cant, lites & controversias, siue Philosophiæ Professores, siue inclytæ Facultatis Philosophicæ Decani constituti, optimè dirimunt, motus disceptantium, feliciter sedant, obscura in luce ponunt, intricatiores Philosophiæ nodos facillimè resolvunt. Et quod principe loco ponendum est, Geometricas mansiones, cœlorum discrimina, siderum machinas, volubiles ac inexhaustos sæculorum tractus, verbo quidquid in tota Mathesi continetur, uterque plena ac perfecta cognitione comprehendit.

Quan-



Quaquam verò ita elevabant mentem ad coeli & astrorum aspectum, ut simul & voluntatem jucundissimo pabulo replerent, atque ex his, quæ sunt hominibus patefacta divinitus, Fabricatorem tanti operis investigarent, amore illius summopere inflammarentur, nihilocius non sunt contenti istâ profanarum artium peritiâ imbui, nisi rerum Divinarum, seu Theologicarum mentem suam ad omnia bona docilem pari vel majori conatu refererint. Grande piaculum meritò rati eos, qui olim laboranti Ecclesiæ opem laturo, & illos, qui ad Christianam veritatem infringendam, adulterandam & corruptendam multa ingeniosè & callidè comminiscuntur, refutaturi erunt, armis idoneis ex profundiore Theologiæ penu erutis non muniri. Cum enim ex oraculo Divino editum sit, pestiferas opiniones Religioni contrarias apud Christianos suboriri debere, in eam adducti sunt cogitationem Viri acutissimi, non modò perutilem, sed etiam magnopere sibi necessariam sacram doctrinam, qua falsas illas erroneasquæ sententias, si aliquâ rimulâ irrepperint, coarguant, ipsiusquæ fidei inconcussæ præcipuos articulos, quibûs nihil firmitus, ac solidius esse unquam potest, ex ipsis Divinis principiis stabiliant ac illustrent. Ad hanc igitur principem augustissimamquæ scientiam emenso vastissimo Philosophiæ curriculo, studiosam voluntatem eo animi ferventis æstu converterunt, ut in sacris litteris pertractandis toti dies noctesquæ versentur, nihilquæ, nisi de sacris rebus agant, loquantur, cogitent, quasi natura eos hac una de causa genuisset, ut res sacras perpetuò contemplerentur. Cum autem ad hoc amplissimum ac penè Divinum munus rectè obeundum, honestatis, probitatisquæ amor maximè juvet, quod à me dictum meministis, si quis mihi Deus eam dicendi rationem, vim, ac facultatem traderet, qua possem honestissimâs quasque vivendi rationes ab incunte ætate ab illis susceptas, & ad hoc



usque tempus perductas, satis dignè commemorare, non est mihi dubium, quin æternam & immortalem apud mortales omnes futuram summæ virtutis eorum memoriam non mediocriter amplificaturus essem. Hæc enim singula Viris in hac sacra facultate celeberrimis, primisque Capitibus documento fuere, ut eos omni ex parte dignissimos concordî voce Insulis Theologicis decorare, & in venerandum Doctorum cœtum cooptare videantur. Sed cum ingenii mei vires perexiguæ sunt, virtus autem illorum incredibilis ac propè Divina, certè non decus aut splendorem ab Oratione mea capere potest, sed contra potius à virtute horum præclarissimorum Virorum genium & immortalitatem Oratio mea, si qua foret sinè ulla dubitatione esset receptura. Verùm, quod neque unius hominis parùm eloquentiâ valentis conatus, neque exiguum temporis spatium ad exarandas laudes, horum Virorum constitutum semel satis præstare possunt, id eis Alma hæc scientiarum Parens ad gratam & immortalem nominis, laborum, meritumque deprædicationem perpetuò præstabit. Transmittet de ætate in ætatem illa seræ posteritati, & donec literis suis habebitur honor, eoque dulcissima illorum recordatio bonorum omnium vocibus personabit.

---

*Typis Collegii Majoris Universitatis Cracoviensis.*





Biblioteka Jagiellońska



stdr0008791



